

NO. SOALAN : 120

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEEMPAT,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : Y.BHG. DATO' SERI MOHAMED AZMIN
BIN ALI [GOMBAK]**

TARIKH : 16 MEI 2016 (ISNIN)

SOALAN :

Y.Bhg. Dato' Seri Mohamed Azmin bin Ali [Gombak] minta PERDANA MENTERI menyatakan apakah persediaan PETRONAS berdepan ramalan firma Goldman Sach yang menjangkakan kelembapan dalam industri minyak dan gas akan memburukkan lagi masalah ekonomi negara.

JAWAPAN: YB SENATOR DATO' SRI ABDUL WAHID B. OMAR,
MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, firma Goldman Sachs meramalkan kejatuhan harga minyak dunia kepada paras USD20 setong. Ramalan ini adalah berdasarkan kajian dalaman firma Goldman Sachs. Dengan harga minyak yang sentiasa berubah-ubah dengan paras terkini pada lingkungan USD40-45 setong, ramalan seperti ini adalah lebih sesuai dilihat di dalam konteks yang sepatutnya iaitu mengenai kelembapan harga minyak mentah global. Tidak dinafikan kelembapan harga minyak mentah global merupakan situasi semasa yang dialami oleh semua syarikat pengeluar minyak dan gas global. PETRONAS telah melaksanakan pelbagai langkah proaktif bagi menghadapi kelembapan dalam industri minyak dan gas pada masa ini dan masa hadapan. Di antara langkah-langkah yang dilaksanakan adalah seperti berikut:

Dari segi pengurusan perbelanjaan: PETRONAS kini sedang meneliti semula perbelanjaan operasi ("OPEX") dan perbelanjaan modal ("CAPEX") untuk menangani impak harga minyak mentah yang menurun, di mana pengurangan berjumlah RM50 billion telah disasarkan bagi OPEX dan CAPEX sehingga tahun 2020.

Dari segi peningkatan kecekapan: PETRONAS telah melancarkan "Project Cactus" yang telah dilaksanakan bagi tujuan mencapai beberapa sasaran jangka masa pendek dan jangka masa panjang.

- Untuk jangka masa pendek, “*Project Cactus*” telah meneliti langkah-langkah yang boleh diambil di dalam mempergiatkan aktiviti penjanaan tunai (“*cash generation*”), pemudahan proses (“*process simplification*”) dan pengurusan projek (“*project management*”) yang lebih cekap.
- Untuk sasaran jangka masa panjang bagi “*Project Cactus*” adalah untuk mencapai peningkatan modal insan di dalam syarikat, pembangunan teknologi, di samping memperkuuhkan budaya kerja dalaman PETRONAS.

Adalah dijangkakan langkah-langkah yang diambil ini mampu mempersiapkan PETRONAS di dalam menghadapi situasi kelembapan dalam industri minyak dan gas pada masa ini dan masa hadapan.

Sekian, terima kasih.